

## DOMENIE XVII «VIE PAL AN»

### Antifone di jentrade Sal 67,6-7.36

**C**hest al è Diu te sô sante cjase.

Diu al torne a menâ a cjase chei che si jerin pierdûts,  
al è lui che i da al popul fuarce e vigorie.

### Colete

Diu, protetôr di chei che in te a sperin  
e che cence di te nol è nuie di valit e di sant,  
multipliche sore di nô il to boncûr  
par che, tignûts sù e guidâts di te,  
o imparin a doprâ lis robis ch'a passin  
in mût di restâ plui tacâts a di chês ch'a durin par simpri.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE 1 Re 3,5.7-12

**Tu âs domandât par te di rivâ a capî.**

Dal prin libri dai Rês

In chei dîs il Signôr i comparì in sium a Salomon vie pe gnot. Diu al disè: «Domande ce ch'o ai di dâti». E Salomon al disè: «Signôr gno Diu, tu âs metût re il to famei impen di gno pari David e jo o soi masse zovin e no sai ancjemò fâ di sorestant. Il to famei al è framieç dal popul che tu âs sielt, un stragjo di int, tante che no si rive ni a contâle ni a savê trope ch'e je. Dai al to famei un cûr plen di sintiment par rezi il to popul, par disserni jenfri il ben e il mâl, parcè che cui podaressial rezi il to popul ch'al è tant grant?». I plasè al Signôr che Salomon al ves fate cheste domande e Diu i disè: «Za che tu âs domandât chest, che no tu âs domandât par te ni vite lungje, ni ricjece, ni la muart dai tiei nemîs, ma che tu âs domandât par te di rivâ a disserni cun sintiment ce ch'al è just, ve che ti fâs ce che tu âs dit: ti doi un cûr ch'al sepi capî e giudicâ come che no lu à vût nissun prime di te e nissun no lu varà daûr di te».

Peraule di Diu.

### SALM RESPONSORIÂL dal Salm 118

**R.** La tô leç, Signôr, e je la mê gjonde.

Mi soi dit: il distin che mi tocje

al è di tignî cont des peraulis dal Signôr.

E je un ben par me la leç de tô bocje,

plui che no miârs di tocs di arint e di aur. **R.**

Ch'al vegni a dâmi confuart il to boncûr,

seont ce che tu i âs imprometût al to famei.

Ch'al rivi chi di me il to boncûr par che o vedi vite,

parcè che la tô leç e je la mê contentece. **R.**

Par chel jo i ten ai tiei ordins

plui che no al aur, al aur plui fin ch'al sedi.

Par chel jo o stimi juscj ducj i tiei comants,

cu la cuâl che no pues nulî nissun troi di bausie. **R.**

A son un spettacul i tiei ordins;

par chel la mê anime ju met in vore.

E da lûs la rivelazion des tôs peraulis;

ur da sintiment ai semplics. **R.**

## SECONDE LETURE Rm 8,28-30

Nus à predistinâts a jessi compagns dal stamp di so Fi.

De letare di san Pauli apuestul ai Romans

Fradis, o savin che, par chei che i vuelin ben a Diu, dut al jude a lâ a finîle in ben, par chei che a son stâts clamâts seont il plan di Diu. Parcè che chei che za prime al veve cognossût, ju à ancje predistinâts a jessi compagns dal stamp di so Fi, par ch'al fos il fi primarûl framieç di tancj fradis.

Che po ch'al à predistinâts, ju à ancje clamâts; chei ch'al à clamâts, ju à ancje justificâts; chei ch'al à justificâts, ju à ancje glorificâts.

Peraule di Diu.

## CJANT AL VANZELI cf. Mt 11,25

R. Aleluia, aleluia.

Benedet sêstu tu, Pari,

Signôr dal cîl e de tiere,

parcè che ai piçui tu âs palesât

i misteris dal ream dai cîi.

R. Aleluia.

## VANZELI Mt 13,44-52

Al vent dut ce ch'al à e al compre chel cjamp.

Dal vanzeli seont Matieu

In chê volte, Gjesù al disè a la fole: «Il ream dai cîi al è compagn di un tesaur platât tal cjamp. Un om lu cjate e lu torne a platâ; po si 'nt va dut content, al vent dut ce ch'al à e al compre chel cjamp.

Ancjemò: il ream dai cîi al è compagn di un marcjadant ch'al va a cirî perlis di chês plui bielis.

Intivât tune perle di grant valôr, al va, al vent dut ce ch'al à e le compre.

Ancjemò: il ream dai cîi al è compagn di une rêt butade tal mâr, ch'e à cjàpât sù ogni sorte di pes.

Cuant ch'e je incolme, i pescjadôrs le tirin su la rive e, sentâts, a metin di bande i pes bogns intes cestis e a butin vie chei scarts. Cussi al sucedarà a la fin dal mont: a vignaran i agnui e a dividaran i triscj dai bogns e ju sgnacaran te fornâs infogade. Li al sarà dut un vaî e un crustâ di dincj.

Vêso capît dut?». I rispuindin: «Si». Lui ur disè: «Par chest ogni scriturist istruît tal ream dai cîi al è compagn di un pari di famee ch'al rive a tirâ fûr dal so tesaur robis gnovis e antighis».

Peraule dal Signôr.

## Su lis ufiertis

Acete, Signôr, i regâi

che ti presentin pe tô gjenerositât

par che chescj misteris sants, cu la virtût de tô gracie,

a santifichin i dîs di cheste nestre vite

e nus menin a la gjonde eterne.

Par Crist nestri Signôr.

## Antifone a la comunion Sal 102,2

Benedis, anime mê, il Signôr,

e no sta lassâ in dismentie nissun dai siei plasês.

## O ben: Mt 5,7-8

Furtunâts chei ch'a àn misericordie, parcè che a cjataran misericordie.

Furtunâts i monts di cûr, parcè che a viodaran Diu.

## Daspò de comunion

O vin gjoldût, Signôr, il sacrament dal cîl,

memorie eterne de passion di to Fi;

fâs, par plasê, ch'al zovi pe nestre salvece

chest regâl che nus à dât tal so boncûr cence fin.  
Lui ch'al vîf e al regne tai secui dai secui.